

詞部集

詞部

御製題武英殿聚珍版十韻

有序

校輯永樂大典內之散簡零編並蒐訪天下遺籍不下萬餘種彙爲四庫全書擇人所罕覩有裨世道人心及足資考鏡者剞劂流傳嘉惠來學第種類多則付雕非易董武英殿事金簡以活字法爲請旣不濫費棗梨又不久淹歲月用力省而程功速至簡且捷考昔沈括筆談記宋慶歷中有畢昇爲活版以膠泥燒成而陸深金臺紀聞則云毘陵人初用鉛字視版印尤巧便斯皆活版之權輿顧埏泥體麤鎔鉛質軟

俱不及鍍木之工緻茲刻單字計二十五萬餘雖數百十種之書悉可取給而校讐之精今更有勝於古所云者第活字版之名不雅馴因以聚珍名之而系以詩

稽古搜四庫於今突五車開鑄思壽世積版或充閭張

帖唐院集周文梁代餘同為製活字用以印全書精越

鵝冠體昨歲江南所進之書有鵝冠子即富過鄴架儲活字版第字體不工且多訛謬耳

機圓省雕氏功倍謝鈔胥聯腋事堪例擬泥法似疎毀

銅昔悔彼康熙年間編纂古今圖書集成刻銅字為活版排印歲工貯之武英殿歷年既久銅字或

欲稿缺少司事者懼干符適值乾隆初年京師錢貴遂請毀銅字供鑄從之所得有限而所耗甚多已為非計且使銅字尚存則今之印書刊木此慙予既復羨黎棗不更事半功倍乎深為惜之還教慎魯魚成編示來學嘉惠志符初

乾隆甲午仲夏

祠部集

提要

武英殿聚珍版



臣等謹案祠部集三十五卷宋強至撰至字幾聖錢塘人官至三司戶部判官尚書祠部郎中宋史不為立傳曾鞏序稱其為韓琦所知常引入幕府自助今世所傳韓忠獻遺事即至所撰其歷官本末見於集中者大約登第後謁選得泗掾以薦令浦江東陽元城諸邑又嘗入為京曹從韓琦辟入陝西幕府其上河北都運元給事書所云四歷州

縣三任部屬者可以見其生平大槩至爲大賢所
嘉契其才品卓有可稱而所作奏牘之文曲折疏
澁切中事情尤爲有裨世用杭州志稱韓琦出鎮
時上奏及他書皆至屬稿琦乞弗散青苗錢神宗
閱之曰此必強至之文也因出其疏以示宰臣新
法幾罷是固琦之忠誠惻怛足以感動人主而至
之文章懇摯亦有以助之集中諸體詩沈鬱頓挫
氣格頗高在北宋諸家中尤可別樹一幟觀所作
送邵秀才序稱初爲鄉賦舉首賦出四方皆傳誦

祠部集原序

幾聖諱至姓強氏餘杭人幾聖字也爲三司戶部判官
尚書祠部郎中旣沒其子浚明集其遺文爲四十卷屬
予序幾聖少貧能自謀學爲進士材拔出輩類出輒收
其科其文詞大傳於時及爲吏未嘗不以其閒益讀書
爲文尤工於詩句出驚人世皆推其能然最爲相國韓
魏公所知魏公旣罷政事鎮京兆及徙鎮相魏常引幾
聖自助魏公喜爲詩每合屬士大夫賓客與游多賦詩
以自見其屬而和之者幾聖獨思致逸發若不可追躡

魏公未嘗不歎得之晚也其在幕府魏公每上奏天子以歲時慶賀候問及爲書記通四方之好幾聖爲屬藁草必聲比字屬曲當繩墨然氣質渾渾不見刻畫遠近多稱誦之及爲他文若誌銘序記策問學士大夫則簡古典則不少貶以就俗其所長兼人如此魏公數薦之朝廷以謂宜在館閣然未及用魏公旣薨之明年幾聖亦以疾卒幾聖之遺文在魏公幕府爲最多故序亦特反復見之覽者可推而考之也其行治官世已著於誌幾聖之葬者故此不著元豐三年七月五日亳州樗堂

曾鞏序

祠部集目錄

卷一

五言古詩三十四首

卷二

五言古詩二十七首

卷三

七言古詩四十二首

附錄二首

卷四

五言律詩七十九首

卷五

五言律詩一百三首

卷六

七言律詩九十三首

卷七

七言律詩八十二首

附錄
二首

卷八

七言律詩八十八首

卷九

七言律詩七十一首

卷十

七言律詩七十一首

卷十一

五言排律詩二十六首

七言排律詩十六首

卷十二

五言絕句詩

六言絕句詩

七言絕句詩

卷十三

劉子七首

卷十四

表三十二首

卷十五

表三十首

卷十六

表三十首

看詳三首

卷十七

狀五十四首

卷十八

狀六十首

卷十九

狀四十二首

卷二十

狀五十七首

卷二十一

狀七十二首

卷二十二

啟三十一首

卷二十三

啟四十首

卷二十四

啟二十九首

卷二十五

書十二首

卷二十六

書十七首

卷二十七

書七十七首

卷二十八

書五十三首

卷二十九

書九十首

卷三十

書八十五首

卷三十一

書八十二首

卷三十二

書四十二首

卷三十三

策問十首

頌一首

銘一首

序九首

跋一首

記五首

舉詞三首

考詞十一首

牒詞六首

卷三十四

祝文七首

祭文十六首

行狀一首

卷三十五

墓誌銘十首

遺事記一首

祠部集卷一

宋

強

至

撰

五言古詩

次劉才邵送魏彥成韻

國朝廣仁恩法令去煩苛三官貴持平除川不慳可矯
 矯魏詳刑儒術富而夥餘事及刑書議論不偏頗能令
 舞文吏無計得掀簸計其所平反陰功已堆塚神方介
 以福豐獲報勤播當卽趨要塗鳴玉清以儼誰云出處
 問此事難預揣秋風鄉思動請郡向江左猶冀款襟顏

已聞將博能想見桐州民延首候來舸置酒樂佳辰
刺插黃花朵

依韻答吳殿丞應之見寄

古人不可見空名留竹素幸而並世生千里或相去懷
賢我何勞蓄道公其富老驥伏櫪鳴使看驚駘步浩歌
掉簪紱思極江山趣西風動遊袂撒在千巖路賤子匹
馬來邂逅一相晤既見豁所懷私心願執御論議攻不
破牢若金城固作詩遺長髯知異眾人遇

向負春遊辭以風雨開霽既夕樂事未果因書百

言聊以自戲

常恨春日少况遭風雨多桃李冷不覺
案原本如濁河關二字
廣陌斷游騎寂不聞行歌方其正雨時樂事空蹉跎晴
來又累朝日暖風祥和紅入桃李枝綠轉池塘波何曾
到花下把酒呼青蛾屈指九十期今已一半過繫日乏
長繩欲却無神戈花若解笑人謂我前言何

道旁松

何年澗底栽移植俯官道腹空蟻穴眾枝瘦龍脊裏斧
斤須良材霜雪豈終老大有歲寒操見盡桃李天

雷君自陝及門謁與書借聊成短篇以答來贖
 一官偶來泗舉動畏謗嘲萬事不掛齒終日口欲膠所
 學未信時尤欲密斂包賢者或我顧未免談屢交雷侯
 將家子而至自陝郊踵門謁予書享饋煩絃匏始見氣
 頗勁既語理不殺愛子欲子薦言畢徒喁喁託蔭須高
 林而乃依寸茅盡行游鉅公一言變魚蛟

聞杭饑

皇祐二年

客從吾鄉來告我歲大歉白金易斗粟富者頓屢撼餓
 殍相枕藉億口盡虛領客言尚未竟予淚已成點避席

駭相問予衷不能掩位卑俸給薄用度抑難減是以之
 官日盡室來未敢予行弟獨留居常動予慊歲凶吾產
 薄慮其苦粗淡所以聞客言私懷輒興感客遽前止予
 君言固足貶善自憂家為微俸誠亦忝上有天子明封
 章日可剡先陳劭耕稼次述抑聚斂澄汰兵籍冗惇尚
 土木儉坐使四海富寧患食不糝胡為所謀狹而復自
 戚慘再拜起謝客予言愧塵玷

上知郡都官

列郡二千石所理我與共臨淮守最賢其口交一頌彼

邦困飛蝗我境欲集鳳彼民粒不充我黍地無空去聲嚴
 乎如秋霜巨猾弗得縱斷乎如著龜吏法不敢弄鈴齋
 畫觀書朱轡春勸種明堂購眾材我公實梁棟行吐胸
 中奇勲名光有宋賤生何為者碌碌備僚從天幸所與
 薄半歲侍羈鞚鸞雀勢力小鵝鴈食口眾貧賤兩雖甘
 瀝懇輒披控朝廷重為邑外臺薦方用豈惟進寸蹠抑
 可利微俸私心覬公舉如昔望郡貢媒術士所醜未罪
 已自訟公如飛一章舉族免飢凍

呈屯田

溪水日夜落稍稍露沙面經旬更不用深處亦成澱巨
 篙架空航澀若泝淺淀沉乃載百指數纜安可緯念此
 歸思發急踰強弩箭公如惜滯留願借長風便

送藥王圓師

吳僧甚商賈嗜利角毫芒或以醫自業利心劇虎狼今
 時愚鄙人平居恡私囊寒餓來求仁一毫不肯將不幸
 病且亟呼醫計倉忙惟醫所欲求萬金弗較量吳僧業
 醫者十室九厚藏張口待人哺喋喋厭酒梁求其不爾
 徒蕭叢揀蘭芳圓師何許人出家本衢梁自圓之先師

三世爲醫王圓尤得術精一丸起膏肓雖掛吳僧籍亦
吳其衣章仁義薰厥心愈彼不願償人以財啗圓惡如
唾霑裳晨齋未有餘一餅蔬充腸行囊無長物秋風藥
裏香昨因赴人急瞥然來浦陽始見已可變氣溫語端
詳再見結所好佛外喜縑緗住久見益數乃知數事長
作詩聊記師豈曰爲行光

題婺源胡氏翛然堂

歛山碧參差歛水綠演漾之子山水間築室傲天壤山
空鳥飛鳴水淨魚下上觀魚悟至樂聽鳥悅幽響一樽

泯悲懽萬事齊俯仰人境兩翛然無復塵區想故人石

渠英緣以命堂榜作詩羨高懷中服非外獎

孫莘老名堂詩

嗟今急名人疾足投世網心撓跡固喧求得道已枉茲
理曾莫知所趨岐已兩予亦慕子徒泉石久思往何當
伴琴觴一鼓東南漿

攜印謁新守宿至德上方翌日馬上十四韻

攜符拜州守半舍度微徑

院距邑十五里

有僧謁道傍云我迂

邑令因徐指叢林佛宇頗巖淨願驅大夫馬一宿憩征
鐙我生嗜煙蘿聞此愜幽興乃留驗僧言金碧果輝映

捨策游上方塵襟覺疎瑩山氣亂朝暮谷響答鐘磬清
風中宵來雲斂月垂鏡微吟不知旦坐席若初定遂行
登脩塗回首謝巖磴咨予秉微尚碌碌奚足競一月兩

移府

未署事前已嘗詢府

未暇救民病徒爲章服裹折腰損真性

予連日奔走吏事蚤出暮還君然兄數賜臨問不

果一見辱遺佳句謹依韻和酬

朝出雞聲新暮歸馬蹄茶思君不得往一飯或三懷自
從伐木興友道寢欲滅夫子眷獨勤聊解子心結

橫溪回道中作

赤雲敝層霄旱日作炎酷解帶蔭廣廈膚汗發如沐世
無廣寒官何地避蒸溽嗟嗟尚未已甲胄報甚速云有
邑頑民飲酒溢鼠腹半酣張空拳中者致殞踣甲令著
定憲繼踵當視覆驅車不敢緩冒暑走山曲敝蓋無丈
陰託庇何局促因思古賢宰民鮮犯鞭扑子賤弗下堂
政務自清肅顧予今何人爲治乃不淑民旣冒重辟已
亦苦匍匐胡不樹善治泰然處華屋

祠僊姑回馬上作

至和歲甲午德音絕常軌寬徭且宥罪外復講羣祀君

言一朝發人神共悅喜今我官浦陽距邑越十里聞有
 僊姑祠獨弗識何氏按圖得本原云是黃帝女當年追
 僊遊茲地倏輕舉千今數千載廟貌尚留此幾欲私謁
 款吏事日勞止遽會郡符降奉行德音旨以廟隸邑境
 俾我即祠所詰朝叩庭下牲體已夙庀巋然重林間楹
 桷極華美姑一婦人焉血食反無已丹朱雖男兒而又
 作堯子生失四海位沒同若敖鬼丈夫不自立始信徒
 爲爾

久雨

雨師握天令汲汲不停駕疾驅鞭羣龍俛首隨叱咤乘
 怒作霧霽不復息晝夜羲印久埋輪縮手喜閒暇山川
 盛奔溢若虞歷陽化農民驗甲子其應早在夏農民謂甲子日
雨夏當大旱我疑上天漏誰能補天罅慰此農民心無使憂
 早稼

寄薛彊

憶昨枉君軒始來就客邸爾僕方息肩顧我遽屈體守
 闈前通名倒屣出致禮相見吐論議所學愈根柢徐爲
 出巨編徹若涉清濟昏膜得篋刮塵心逾易洗我亦露

狂簡君曾不訶詆于時園正花長日甕盛醴插枝必滿
頭飲醜須露底未幾踏歸鐙相將灑別涕戀戀有情照
數數辱書抵自言困道途僅能足鹽米頻吟口燥吻久
騎肉消髀首飛詩人蓬腸苦孟郊薺學舍勉棲託亨會
復傾篋黃卷樂往聖青襟列諸弟愛子乏先容何人堪
密啟努力著要策隨詔獻文陛

伯夷詩

昔紂爲不道毒心無生靈四海如在鼎誰能救將烹周
武從天人戎衣舉仁兵伯夷獨何爲乃諫不聽行紂徒

久厭主一朝倒戈迎天下旣宗周大冊書武成夷義愈
爲恥寧死弗苟生周粟惡不食雙目且餓瞑紂無王者
實徒有王者名雖曰臣伐君紂德匹夫輕呵夷豈不知
意在銷姦萌

書感

擇已要有持擇人要存別淺夫脫所守柔顏附炎熱庸
兒味所擇目前事苟悅彼柔有時變爾炎有時歇歇者
旣死灰變者遂剛鐵平時綢繆地一朝等楚越古人論
淡交君子保常節作詩貽知言不爲昧者說

奉和純甫秋扇

粲粲機中練作扇圓中規
盛夏天無風廣宇猶蒸炊
汗流既浹體蚊齒仍毒肥
團扇當爾日功利兩得施
一入君掌握汗卻蚊攘披
秋風刮地來涼氣襲空幃
功竟勢亦去退藏乃其宜
聖人制器用用舍各有時
弓所以在烏鳥盡弓明為蹄
所以在兔兔獲蹄何之葛屨
乃履霜刺譏見于詩作扇
本禦暑暑退當棄遺奚必昧
用舍託怨班婕妤

八月十六日夜與宗哲純甫翫月

結客城東樓明月初出海
漸如水精盤天寓無寸靄清
光如何買厥價珠百琲中秋
一夕過已覺人意改水輪
縱遲遲此夜復誰待老蟾益
自張吐輝增十倍把酒共
月語世態何足罪自有昭昭
輝千古萬古在

冬日偶書呈縣學李君擇之

北風吹嚴雪草木無媚姿
野田一穗盡雀鼠猶苦飢
浦陽槩窮山不與陰冬宜
今我雖旅宦一身十口隨
有酒奉親壽呼妻伴兒嬉
幽腸尚多感帽結對此時
念子客千里形影外更誰
空齋抱吟膝敝案覆飲卮
我本依賴

少校子反有餘何日富貴塗引子並足馳朝得位夔契
暮致君軒義收身結嘉客量金買妖姬人間有閒愁安
能到雙眉

送純甫仙尉

秋晚送歸客別酒風前酣一揖不回顧瞥然就征驂挽
裾問客故捨我何其甘客言有慈母三歲淮之南今將
拜嘉慶歸心劇風帆薄親厚他人倒置理豈堪顧予失
所問汗顏爲客慙客生貴豪家妙年穿青衫初仕已絕
足不與羣鴛參掾邑尚牽制逸驥受轡銜縱之使自馳
萬里日可貪持此作親壽行矣毋少淹

將別純甫四十字奉呈

我馬將北馳子車亦南挽車馬無留行相去卽相遠風
林秋聲乾落日孤峯晚後會未可知莫使別觴淺

將有東陽之行宗哲爲具話別以詩見招因答來
况

秋高山城幽風動林葉吼百感從中來將分故人手故
人惜輕別樽酒欲相厚未飲已頽然別恨濃於酒

別筠陽

憶初來筠陽風土習未穩家人畏山氣一日或數飯愁
來數去期三載若天遠居之既累月吏人頗云簡山水
饋可觀雞籠肥堪饌却愁解印紱奪此養疎懶觴詠趣
滋適不覺滿銓限門前迎新官槌鼓開田阪顧予謝鄧
侯寧有邑人挽水聲與山光念此違耳目

寄純甫

相從浦陽官三十月盈缺出必並轡游居常對案啜予
編子能怨予短予還許久而見交心中不容問舌
乃於窮秋時忽作遠道別別腸如亂絲一寸知幾結別

問謀之間

語如悲笳一聲凡數咽咽極繼以號旁顧亦慘切匹馬
獨歸來山城雨初歇

依韻答貫中見貽

魚蝦泳大海龍困汙池埋鸞鳳氣塞吭百鳥鳴其喑猶
吾呂夫子短褐包壯懷舉脚踏青雲失勢寸步乖却視
後來輩厭已猶積柴否屯豈我獨升泰奚人皆一別春
四歸聚首邈不諧前日忽踵門謁與行李偕相迎把交
臂似合已擘釵于時節清明花淨無纖穠共引不算觴
傾瀉猶長淮歌詩互挑戰舒慘出百骸愁吟慘春暉樂

詠舒寒夢男兒萬里心無作伏櫪駟天王下科詔羅俊
基泰階盍行取好官一為光同儕

野園移植小松

平生歲寒心頗好歲寒色一松如人長慘淡窮山側樵
兒日過之有意斧斤得予心異爾意野圃為移植醉聽
疎聲眠吟到細陰息落落巖澗姿相對永朝夕如言千
載後其長可千尺人生雖百年相期渺無極且結無情
游汝固予何易豈待百年外人松兩殊迹人為松下土
松化土上石我生始踰壯足以伴寒碧

公立煎茶之絕品以待諸友退皆作詩因附眾篇
之末

造化于草木所與有薄厚茶生天地間建溪獨為首南
土眾富兒一餅千金售公立南須官好去聲居眾富右俸
錢未到門已入園夫手買藏惟恐遲祕之逾瓊玖前日
發箱篋出以奉賓友蒼玉碾底碎浮雲盃面走一飲睡
魔竄空腸作雷吼茶品眾所知茶德予能剖烹須清冷
泉性若不容垢味回始有甘若言驗終久吁茶特不幸
而出三代後不及餘草木盡掛詩人口禹貢籍九州瑣

細登橘柚古若有此茶商紂不酣酒

范鉞進士遺樓徹司馬庭石以質交樓作詩美之

邀某同作

樓君仕塗傑范子儒林選論交二人者誠至不以勉范也車將西樓也酒以餞胡然膠漆地猶假外物顯范子庭前石千年立蒼蘚移入樓君圃重可載十犢堅以示固爰此意豈云淺怪不涉剌刻險不至崖巘坦然久要情無回石間辯其堅竟有泐其重尚可轉不若照以心兩確乃吾善永結忘形游嵌巖君勿羨

和施耕進士憶竹

夫子臥古屋趣敵巖谷深六籍環一身口誦頭不簪瘦碧久去眼寂寞清風心朝思蔭之醉暮思繞以吟秋空碧新弄無處停幽禽安得青玉枝來作半畝陰終朝對几榻歲寒結知音於焉傲富貴追蹤晉賢林

京華對雪

嘉祐歲庚子長安一尺雪落地還成水后土凍欲裂出門望天街層城裏銀闕健馬載高冠傍人指夔尚拜表瑤墀歸酒面風前熱萬井莫回頭窮閭正騷屑曉突無

青煙饑唇悶殭舌咄嗟路邊子未死衣百結亦有待次
人空囊磨歲月愁吟徒爾爲泱泱天地闊

與任道及順久二師賦小閣見月

醉領玉川子夜入支公院危閣邀共登身在霜空半缺
月穿雲來塵區未應見長飆蕩寸藹天宇痕無線坐久
吹青燈寒光可對面飄颻釋苑秀洒落儒林彥相逢愛
清景險語寫幽玩野令才素慳斗爲吟毫健詩成萬象
索孤影轉樓殿遊履絕出門高僧應作伴

誠言

君子言欲艱出口終身俱眾人易由言朝出暮已淪言
之于一身譬若戶藉樞爾樞苟不慎彼戶將誰扶不重
一語言是輕六尺軀志言要有成不成陷半塗恥言在
克悛不悛行卒汙今吾觀衆人一言異朝哺爾志旣可
見爾恥復若無行將小人歸嗚呼爾非夫

一旦壯王國禁網雖小寬
疲俗未全逸惟天念我民
公生高才術發揚雲雨勢
諸方待膏澤天既責公深
眉壽夫何惜行看佩相印
不羨登仙籍南山雅望重
北斗威聲赫果生固難朽
吐納自不息惟昔軒冕徒
尤喜山林跡留侯追赤松
志就亦何益傳說爲列星
但已脫寰域孰如我公貴
與國長無極

送張升甫三十韻

歲餘客秦雍處俗失大方
眼前紛朋游外同異中腸
最得張子晚一見合柔剛
拜我十年兄本非以其長
直緣

父兄舊及此三紀強子之先大夫疇昔倅餘杭子時以
童子進謁升公堂仲兄齒予亞同學隸州庠行聯坐接
席無異彼雁行此時君尚孩縱記今亦忘去住忽南北
中間異行藏後予與君兄鄉貢入帝鄉見面初驚疑偕
問徐乃詳同年忝進士茲復同省郎伊予論契好始見
今髮蒼昨君解下邳東去隨薦章歸來婦翁家春風到
秋霜予居幸對舍有酒呼隔墻往還興頗熟問外絕毫
芒乘月步橫橋觀漁立回塘詩句迭唱酬稍稍積巾箱
自許先功名知我尚激昂放言遺形骸不以我爲狂古

稱管鮑交千載竊相望辭我復云東坐不安吾牀汴水
日向落更久不可航甬東拋田園不治久欲荒急省江
南兄數事皆不遑慙愧挽征袖強留盡一觴何以將別
意時菊有清香

送吳令常甫之武平

朝廷重一邑悼昔容備員自嚴薦舉法頗號近得賢仕
者既擇地主恩那罄宣遐封暨惡壤十必九棄捐武平
杳何所聞裔天南偏林密毒虺藏吐瘴蟠長烟冬候氣
亦暖里俗衣不綿舊令昨請代闕榜張三銓無人議

往常甫獨不然丈夫志四海豈安廬室邊畏避屬衰怯
我今幸壯年所寄有民社勇去無山川吳天破新臘雪
片衝離筵闔坐勸別盃情厚禱亦虔藥餌慎勿疎善保
食與眠掩牙起驚濤餞車散江壖吏民前途奔爭迎上
瀧船到修府中謁首低小侯前主人知才名應以塵土
憐下車轉春首訟未臨婚田遠人喜新君有訢恐不先
據案掃滯務一決如流泉呼兒伴兒戲邑事樂靜便地
寬人物稀林實雜海鮮荔子委樹旁毛魚不論錢飲食
信云美那肯事宴筵政休寧閤齋空腸味陳編他人保

無過歲滿猶自遷矧君資性好進業補未全材長老松
幹氣強直弩弦坐養青雲資歸著要路鞭君家新蔡後
清節能世傳豈必因賞格薦狀期聯翩鄙人忝末契相
識山童顛憂懷自足感況復別緒纏君其慰我私北鴻
附新篇

曾元恕累日不相見以詩垂寄依韻和答

丈夫收功名要在少壯時今予四十強才短良時遺俛
首入掾曹所託真一枝動靜繫他人何異馬受縻事業
乖聖賢飢寒愧妻兒浩歌望青雲致身分已遲江湖久

去眼終日懷釣絲元恕知我深愛惡非衆隨憐我事冗
宦役役猶兒嬉十日不一見敢以奔走辭與子結永好
交情保無移相從文酒歡晚歲滄洲期

走筆成一篇答徐君先輩見寄

定交初何年昔齒會稽學君壯我尚少道復先我覺子
時于衆人百鳥一鸞驚學官程諸生題品或義卓衆方
縮于顧君筆已一捉落紙千餘言渾如玉出璞詞場或
鼓行無敢犯鋒稍有時談遺經聖賢在口角情疾異說
妄摘抉三傳駿語氣清不休旱天冽雷電南北俄乖張

同時去帥幄未幾會京國君羽正濯濯以文試有司好
古拙雕琢一失太常第聞子繼屯剝翠縹累在毛龜剔
釁山穀古人亦憂患千載名愈倬予雖綴小官夙志負
山嶽薄領但戕性祿粟不周啄再命作陋邑舉動尤齷
齷旅巢子何所距我幸非邈寄詩冬爲期當遂笑一握
待將得喪理同付尊酒濁

送元恕

我本生窮閭才命兩乖塞再試得一第失足落銓格去
年赴選集摩肩雜隸役吏口駢名呼摧沮氣填臆僦居

在間坊門巷罕人迹于時苦病吟誰肯顧越鳥高冠縱
一臨車馬有屈色平生青雲志帖帖若墮翼羨君富詞
才時志復兩得解褐拜初命便綴審官籍秋高馬足健
駕言往京國諸父列禁嚴南北羅第宅往來伯叔間此
行穩棲息君家世儒林圖史況山積燈火今可緝幽探
勉餘力京都號紛華君志定非溺勿貽雙親念此外慎
眠食

早行澠池道中

二年別咸秦八月過嶠澠碎石隱地起險塗抱山轉我

馬無完蹄我僕有重趼林紅烈炬暴澗白亂流淺夙駕
露濕衣夕休獨臨饌轍迹環九州孔子未能免咨予獨
何人安坐顏輒覲區區適其宜誓將策疲軟

乙巳十月七日過黃河中流遇巨浪偶作

清且絕大河拍隄袞黃沙巨舟忽搖簸心悸眼亦花咨
予豈輕生將身試魚蝦忠信固所憑此理懼或差定息
神魂寧歸心眇天涯故鄉念昔游湖面帖碧紗醉舫穿
芰荷坦腹如眠家天水自照映鷗鷺相交加雖無風波
憂離齷未足誇豈如尋河源安穩浮靈槎脫略遺近觀

飄飄薄飛霞低頭顧濁流卑險吾汝嗟

過潼關

巨方信天開峭嶮土山口豈惟控內外勢不漏飛走一
夫或當關可敵萬夫守山河此襟帶怙險聖所否明皇
晚倦勤意恃太平久絕艷荒草如轉盼六宮醜祿山假
天性恩豢不知厚鐵騎長驅來哥舒苦徒手吾君暢道
德四海一父母人心自固結茲關復何有

苦雨

關軸連歲旱耕地千里赤官家放租稅猶有道邊瘠羣

國乞膏雨童巫叫蜥蜴神聽久寂莫民意轉凄惻天公
 忽瞑目一怒乖龍殛雨師偃其旁驚起振厥職不復計
 多寡傾瀉信朝夕入地知幾犁陝人以犁測雨之深淺地上但盈
 尺洵如三峽注那辨四簷滴落勢曾未停慮井反憂溺
 始知天公難不易人願適舉頭告風伯速吹濕雲坼却
 還秋日光迤邐照阡陌俾民布新種來歲飽麩麥

幕中偶書

劉侯驅車東幕府賓客稀凭几獨蕭然真與萬事違巢
 燕無世情閒堂時一歸東風忽怒號輒來撼窻扉攪我

靜中趣聒聒無停威塵沙亦侵人猶喜勢力微日暮風
 稍息出戶聊振衣行吟視庭木枝空但花飛幽思感晚
 春浩歌送斜暉翟公大書門怨激恐已非俗物喜去眼
 杜子吾庶幾

徙居

人生如寄客况復真客宦南舟與北車來往若征雁殘

暑赴西雍冉冉忽秋晏三徙乃定居

始至寓法掾廳又徙倅廳又徙書記

安遂什物旋營辦騰移費負挈猶恐僕夫訕幕府文書

稀食息有餘間短才之所補公給浪蒙豢懼辜主人恩

從事不敢慢南軒有佳趣流渠瀉幽澗潺潺無時休弄
水悅童卯關中氣候晚時菊始云綻亦有終南雲朝暮
生顧盼浩歌一樽酒常分任鵬鷄

暮中書懷

宦游老歲月春花漸空枝坐耗鏡中顏日饒鬢邊絲流
俗宜重輕霄雲勢參差剛腸寡所合出門復何之趣向
於今乖考古聊自怡黃卷有聖賢目覽心與期君子顧
萬世小人較一時不見九原骨貴賤共狐狸惟有賢愚
名縱久亦兩岐退之賦二鳥無乃爲物移信已一推天

孟子真吾師得喪付濁醪身外非所知

九日與諸君飲

寒暑當遞遷日月曾陽九綠鬢驚秋風黃花泛樽酒行
樂重此辰登高命諸友古人感塵世宜開笑歌口

送粹中赴舉

朔風攪疎林短日寒無暉有客氣軒昂束書赴禮闈行
橐雖云輕滿抱藏珠璣出以售春官善價其可希骨肉
送出門稚子猶牽衣我爲舉別觴一言庶不違京師足
紛華慎勿事輕肥白首有雙親待子得官歸

石亢之出銅雀臺硯相示信筆題其後

銅雀遺荒基寂寞千載下黃埃朽壤間所得或片瓦硯
材世共珍購金不論把浪好昧所別往往徃亂真假

聞毀

憶初向關中觸熱事西走淋漓汗征衣早夜犯星斗驩
然赴所知辛苦復何有主人喜賓至相見勞杯酒誓將
効毫髮聊以塞所厚遇事因輒言何嘗計從否平生性
坦率問或忤交友是非長安城側身避讒口彼姦乖其
前吾慮亦已後二叔誣周公三人惑曾母青蠅亂黑白

視潔以爲垢聖賢且不免予免焉能苟浩歌動歸歎至
此信不偶春風憶東南巖花映溪柳南山有屋廬釀熟
喚鄰叟何時理扁舟舊物入吾手回頭謝狺狺投北汝
誰受

壬子歲旱

熙寧歲壬子春旱初可怪不雨訖夏尾天地一爐鞴赤
日裂厚土黃埃沒經界農夫望雲霓脰折意未懈待中
守北門撫俗先罷瘵閔雨憂更深徧禱劇齋戒老宮與
佛廟三日一往拜冠者勞於呪褐者勞於唄雨應寂不

聞煩鬱何由快憑誰訴天公請執乖龍械

予初春被病中夏少間勉入省局偶成二十二韻
東風吹春來移病聊少休寒熱戰予軀漸如錯春秋侵
尋日以劇謁告牒屢投性命吾自安所負空食羞交親
每問訊愛者或見憂伏枕數晦朔忽忽月四周有叟肆
躡嚅咄哉我何尤騰口狀予疾張大實頗浮背憎說休
咎唯恐予疾瘳寧獨冀術勝仍欲悅予仇叟乎汝何忌
天命非爾謀生死籍素定理莫移恩讎身世如寄客日
月速置郵引照盍自做霜雪滿汝頭胡然不知止脅肩

諂貴游平進苟朝暮利吻銛戈予今偶不死官意滋
悠悠卻來坐省局心跡逾林邱北扉對新篁陰薄韜已
修薰風送瀟洒不博千戶侯富貴功名間有待終無求
鸞鳳志寥廓燕雀徒啾啾

某蒙君章兄寵示櫻桃佳篇輒依韻奉和

炎蒸有正色下與地氣關相結成含桃使冠白果班獨
憂赤日曝坐變紅成般多應絳闕種上聲流落來塵寰金
盤瀉不定四走如循環睡龍失火齊領空皆血潛以口
比樊素白傳誇嬌鬟卻嗟荔子陋遠在炎荒山每歲貢

天子險路勞緣坂豈如盛京洛地廣生不慳朝須暮可
進先御後匪頒離樹既不久弗改猶童顏吁嗟唐中宗
游樂芳林閑芳林園名君臣失儀度口摘省手攀不聞薦先
廟書在史冊間愈籍爭詩豪勁句嘗往還予知青冥賜
難到山溪灣韓退之和張水部敕賜櫻桃詩有傳賜出青冥之句林園幸自有圓
顥赫不黜雖熱豈厭食縱密寧忍刪况此鮮嫩質非並
青梅頌

羣牧司雨中池上作

累朝困炎威一雨轉愁意偶看碧蘆叢宛在滄洲地岸

草閑自滋庭葉紛以墜移牀就幽窻簷溜聒清睡

送章傳道東歸三十八韻

一日或數篇數日哦一軸夫子之於詩夜補晝不足長
吟天地間萬象困題目天徒飽其才而特餒其腹聲名
三十載半百事場屋年年試春官淡榜輒不銜東風吹
殘花客淚迸京轂回頭謝青雲卻抱來時玉河陽謁相
公每見輟飯沐贖金寶空囊禮遇駭僮僕遂游西諸侯
騎馬度函谷長安尋素交零落半邱木惟有終南山相
看似舊綠東李雅好客既親意轉篤授館如投家長杯

繼宵燭羸馬殘青芻餞僮厭餘肉予方坐幕府陷嫉苦
流俗羣吹耳且盈介立趣頗獨得君倍歡然坦不置邊
幅論情雖云晚聞誼固已夙二章初交鋒懦氣令避縮
自笑不量力強和旋取劔從此遺形骸留饌或脫粟有
酒時招邀共醉小軒竹議論到聖賢道德宮停蓄豈比
篇章流烟雲繞心曲飄飄走邊城新禁察儒服戎帥不
敢延進退勢俱觸六月汗霑衣幾作窮途哭回來臥旅
舍所得不充欲鄉思生秋蛩經裝遽云促行當買淮田
晚歲謀退築予材覺無庸計慮亦既熟無姿媚要權與

世背馳逐祇合從漁樵胡爲苟寸祿淮吳宰相豈有鄰
可容卜浩歌老吾生爭食任雞鶩薄宦猶糜人歸飛羨

黃鶴

予以病久不赴朝謁因灸三里穴罷信筆偶書

竊祿了無補臥疴慙有日空聽朝雞鳴咀挂朝衣出啓
處不自安灼艾加諸膝庶幾起沈茶犬馬委微質

立秋後病作此寫懷

臥病喜秋至昏煩庶以平清風不少濟宿疾仍相嬰涼
葉猶未振陰蛩已先鳴四時順萬物奚獨戕吾生

入山謁怡然上人因成短篇皆書卽時事

行穿六松陰鳥語逢人寂林僧洗山鉢正了寒堂食揖
我喜滿顏吟窻半軒闢鳳凰山名不無情天外送佳色春
風動花雨枝上或涓滴羨師得安住我亦有閒適出門
懶鞍馬把袂步幽石石盡浮泥深恰恰露雙屐臨別心
徘徊野店更一息

僧副普濟過予詰其師名僧職之所自則曰嘗活
飢民百萬朝廷論酬以得之欽嘆不足繼以詩云
佛子葦麻衆槩能驚食人庸奴買師名納貲不計緡普

濟釋苑秀類同行佛均往歲東陽饑愁聲聒蒼旻天民
坐欲死誰肯發一困師勇營饘糜全活百萬民外臺上
其事朝廷嘉師仁相府議優賞美號寵厥身汝往貳爾
正示勸出聖神今時士大夫體雖具纓紳十九飽妻孥
何暇及困貧視師固有激抑可警其倫

墨蟹

瑣瑣江湖中忽在兩人壁短螯利雙鉞長跪生六戟骨
眼驚自然熟視審精墨初疑螻穴束猶帶浮泥黑橫行
竟何從躁心固已息終朝牆壁間頗有肥霜色我來空

陸君置酒爲予唱陽關卽席有作

陽關何處草烟平不識陽關空記名古人驅車欲西過
吟成善寫離羣情天涯此去故人絕雖有樽酒同誰傾
古人幽怨幾時盡至今愁殺陽關聲陸君酒酣喜自唱
坐上客淚俄縱橫杯盤咫尺意萬里忽若身在關山行
耳傍宛聞車馬動簾外已覺邊風生乃知酒樽須故舊
爲君一飲無餘觥

結交行

貴友高車照簪組富友黃金輕糞土二友方論富貴交

以漆傾膠入心腑一朝金盡囊無餘門前不見簪組車
貴人今車底似昔早失黃金舊時客由來結交要勢均
一輕一重難爲人滔滔世上耳餘輩寂寥管鮑今埃壁
交情以勢不以義今日雖同明日異君子結交自有持
賤貧富貴不我移

依韻和李評文思

我心炯炯君應識萬事都慵獨吟癖二年客眼看京華
可見無媒進無益勢門所喜在佞豪直語空拳無一擇
愛君挺拔生貴家不學庸兒醉朱碧兩提試筆賦翰林

落落金聲天上擲改丞殿省頭不回直把羣經重研撫
相逢憐我猶滯濡四十金闈未通籍勢門宜不容此身
賴有君家好投跡書齋延坐開新編光燄文章追祖白
更邀詩社同襟期脫略形骸一疏戚公侯必復君勿遲
志士由來輕尺璧

贈賈麟

賈君貌古文章老虬髯鋪眉插腦戲誇才力驚衆人
談笑千篇筆端掃酒酣座上披天真剗去崖岸露懷抱
今年禮部更新書續詔九州登俊造宿儒晚秀趨術忙

肝愁胃苦搜辭藻獨君所向異爾爲長袖披陀踏幽草

君近遊
徑山

行窮兩徑躋巖巖指點晴江辨秋島却騎匹馬

歸湖山古寺相逢情愈好空樽無物醉故人輒出囊錢
具梨棗更長坐久然青燈語雜譏諧欲顛倒我方正色
起問君何乃終年事枯槁齒牙未豁才有餘一賦從容
成腹藁琢磨高論馳古今足歷天衢騁王道駕羣沓沓
猶爭先驥驟胡然甘伏阜君徒俛首不我答我以慙顏
汗如澡丈夫貴富難近窺一第定非論晚早豈同祖誼
名漢朝位不公卿身已天何時却掛吳淞帆霜蟹初肥

拾新稻

前日以詩贈賈麟進士繼蒙和答而楊蟠從事亦
次元韻鄙思不休輒復自和二篇

賈生俊辯凌諸老二十漢廷冠插腦魁奇遠裔空傳家
慘淡壯年翻却掃巧心用過金幾緡憤淚頃乾玉三抱
五湖夢數歸何時四海形單生不造鄉宴無心聽鹿鳴
時平有口歌魚藻每舒意氣拂劍光懶把窮通叩蒼草
江河飲肺吞阮劉風月吟腸笑郊島君才慎勿恃晚成
俗態由來尊少好衆人競進皆握苗獨子甘貧猶嗜棗

囊裝未抵一羽輕筆力堪支泰山倒閒身自放壠上耕
愁面誰憐澤邊槁幽尋騎馬衫覆羈冷臥乏氈牀露藁
無勞兒女憫滯材豈竟乾坤厄吾道從前半步封公侯
亦有逢辰出輿阜光華聖旦髮可晞涵泳儒流身已漉
收還事業幸未遲揖取功名須及早不然一世成虛生
雖曰百年實如天公朝富貴弗汝慳仕路高車似麻稻

其二

愛君氣幹霜松老一見相投許肝腦豈同世上秋葉交
不及歲寒如電掃有才無命三十強寂寞吟齋膝長抱

愁來徧踏公卿門縱褐不縫誰改造文章直吐元化胚
天樸豈須施斧藻長篇下筆縱立成一字未曾傷草草
辭源奔注吞衆人有似驚潮沒孤島善君取友論片能
不學常情求百好琢磨六藝相與游我媿性靈昏樵棗
平湖淨淨時招邀爛漫清尊爲君倒客塗見月凡幾圓
勸馬聲飢奴色槁路傍甲第欺儒冠奴厭腥肥馬餘藁
我疑造物偏膏粱富貴何緣慳有道貫糜巨室君空囊
朱紫摩肩君衣阜大鵬寧合安尋常怒翼天池終刷澡
功名豈必收目前兩鬢未銀猶得早顏彭骨朽千萬年

漫與後人論壽夭君其努力攀青雲盛醉春風釀香稻

安用趨惟晤師斑竹杖

蜀江濯錦含文漪竹生江岸初綠滋錦波一浸入竹肌
萬洗不落斑在皮又聞淚點灑舜妃遺跡漸染傳今時
搯不受爪滑可持隱起高節無屈敬江神雖寶莫自私
煙根忽逐霜刀離截而爲杖得者誰龐眉大士今一枝
編爛頗與壞衲宜朝躋山巔暮江湄山備兕虎江蛟螭
爾杖未折莫汝危足力自健無險巖安用童子兩肩爲
當年常竹紋無奇猶託變化神葛陂况此已是斑龍兒

長恐一旦風雲隨復整頭角還天遠未必久爲師有之

和禮之喜雪十二韻

水官司冬不舉職天地當凜氣輒溫頑風伺隙倒大令
掃蕩不使繁雲屯陰崖邃谷始窮臘空有雪意乘朝昏
宿麥老枿亦借便欲洩陽氣芽株根往往百怪竊窺視
思以沴疫傷羣元賴吾太守爲民切百拜默與上帝言
臣因視民間農計亟雪猶可望有年知民所欲弗帝告
安用備位稱守藩至誠一發動天聽霄垠地堦俄瓊璠
混然上下共一色直疑元氣猶胚渾狂風埋藏反失勢

却授威柄還水官旣云豐年在冬雪豫擬癡腹盈朝餐

送關景芬秘書赴山陽尉

峩冠初上童兒首君已老成予輒友肺肝相照二十年
今日不殊前日厚紛紛共笑薄媚徒對面論心回面否
吁君意氣非昔麤猶著青衫從吏部得官將尉古山陽
有蘊無施州縣後山陽楚邑爲最雄聒聒衆咻千萬口
階庭聽命趨上官守閣使臺鞞日走舟車冗客來百須
政逐從違成好醜君才遇事有卷舒公道當官膽如斗
或時畏縮類懦夫私請不容毫髮受往行素守裨長官

肯到縣廳同木偶頗聞波俗殊東南例重市門輕隴畝
鹽商茗販白刃隨切與椎埋破淵藪能聲自可博已知
懶趁庸兒媒左右吳江日暮山川愁踈樹烟頭排敝帚
北帆欲掛傾別觴還有陰風吹散酒醒難爲別醉幾何
人世無時好分手知君此去忘故園淮月楚雲惟我有

送吳判官

雨乾青活淮上山君領善課趨帝關春風滿路馬足健
翩然征轡不可攀吁君登科越一紀中又困躓懼苦艱
蒼虬垂髯猛虎臥青衫四十鬢欲斑我疑君胸典籍府

千軸萬卷羅其間聖經賢史及怪說叩之不已如循環
有時啓口論時病往往憤發涕欲潛位卑道屈志未就
姑以大筆誅雄姦就令君居太史局猶足上下馬與班
剛然古膽貫白日不爲權貴柔正顏退之嘗患天地惠
偏向君子懷獨慳高冠大笏盡知已行矣得意東南還
贈徐君強

浦陽窮僻山縈迴徐子匹馬窮山來十年不見安否外
怪子面黝身紅埃自言壯圖醉無幾獨有古膽剛不摧
日子篇章遣孤憤袖出巨軸爲我開密行細書幾千字

一一紙上皆瓊瑰渾然天成有警句直若未剖元氣胚
問工磨琢弄纖巧真宰手把天葩裁詩人古亦少達者
非特徐子如寒灰孟郊老獨張籍瞽李杜落魄皆何哉
剔抉幽祕奪造化雖甚寒餓天弗哀又疑才命不俱得
既奪之命止與才子今所往但逢蹇絆驥兩足猶驚駘
浦陽山深尚春淺桃李纔榮花正梅子時過我值訟簡
花下一飲將百杯酒酣慷慨起勸子更厲頭角需風雷
縱令不偶竟窮死猶愈空腹冠崔嵬

邑舍東池近日荷花盛開輒書短篇奉邀宗哲純

甫二同僚

前時乘暇到池上荷花未開荷葉小彌旬風雨隔追賞
期會簿領復煩擾今朝始得臨舊隄花開已繁葉將老
古人最謂行樂急癡兒漫欲官事了錢楊與我近同趣
一樽今待共君倒聯鑣且來趁花飲莫待紅稀并綠槁

七夕

七月七日暑氣徂此夕何夕樂且娛世傳牽牛會織女
雨洗雲路迎霞車初因烏鵲致語錯經歲一會成闊疎
牛女怒鵲置諸罪拔毛髡腦如釧奴星精會合不可詰

我疑此說終誕虛又言星能遺人巧羅列瓜果當庭除
綵絲貫針望星拜夜深乞巧勞僮愚吾聞樸散形器作
人奪天巧天無餘匠心女手劇淫巧工與造化分錙銖
薦紳大夫一巧宦坐取公相如指呼間乘巧言惑主聽
能改茶檠成甘腴纖辭麗曲騁文巧剜刻聖道無完塗
星如有巧更可乞益恐薄俗難持扶我願星精遺人拙
一變風化猶古初

題蘊忠上人歛硯

山僧有硯名龍尾此石來從歛溪水通明直可照髮毛

瑩滑不容安手指案上長疑片月生匣中自有浮雲起
蒼然顏色涵秋波不學端州誇嫩紫溪匠琢爲寒瓦形
如從銅雀初飄零只仍故狀不復改獨有亂點生繁星
高閑上人妙書劄什襲藏來時一發拂開輕霧磨煙煤
渾洒霜毫冰紙滑咄嗟此硯何爲哉世上別有潤色材
胡不往焉與徘徊日濡大筆把詔裁無久滯此空塵埃

通判國博中齋詩

天帶以中爲大本天地得中能自生古之聖賢一用中
政刑禮樂萬事平於戲後世中道喪政分寬猛刑重輕

禮非儉陋則奢僭樂不專一須鏘鏗其間萬事亦頗僻
或過不及誰與繩今公奮然力追救大署中字爲齋名
謂中之迹不可見粲焉其道存六經尚書洪範有皇極
春秋王道爲權衡在易之爻貴二五于詩無邪義甚明
子思著篇究根本王通命說垂儀刑攸探羣書味中理
雞鳴而作還奉行出處語默皆時中措諸萬事無側傾
有時賓至相與樂詠歌亦作中和聲簷前竹樹有中色
四序不改長青青公今一州貳守政千里猶變中庸疇
異時朝廷贊天子擴之四海中道成某得攝齊升公齋

一聽中論退服膺

還府推楊學士無爲編

蜀山秀色參天起子雲文章摩玉壘關右衣冠從古名
伯起光華擅楊氏後來氣象幾寂寥今日西州聞學士
吁雄述作擬聖人蹭蹬三朝官不徙震雖有時無雄文
而又晚齡纔得仕豈知學士丁妙年一日青雲趨萬里
高才大筆驅古今奄有震雄兼二美布衣平昔抱經綸
浩蕩著書窮日晷幽居獨占無爲山因以名編仍號子

學士既以無爲名
編復自號無爲子
鑿開元氣爭化工剔出微情泣山鬼

先儒浮友遭芟鋤直與六經相表裏青衫冗掾錯致身
四十磨肩維胥史日趨官府舊學荒已分清流將絕齒
前特輒辱授此編如以咸韶震聳耳夜侵燈燭晝廢餐
若涉江河徐見涘乃知無爲非不爲道化自行而已矣
立朝本此足有施堯舜吾君那出是天球豈合藏窮家
再拜持編復齋几

謝通判國博惠建茶

建溪春早地未暖建俗巧計催春陽茶傍萬口噪地烈
驚破芽英不得藏猶嫌旂槍已老硬獨愛烏嘴嫩赤長

擷而焙之一朝就更範圭璧爲圓方南州尚珍北固重
自非富貴寧預嘗浦陽賤官性怯酒素許茶味爲最良
日分牒訴費齒舌口吻鎮燥喉無漿建溪奇品遠莫致
日夕夢想馳閩鄉塵埃填心渴欲死忽拜公賜喜可量
拆封碾破蒼玉片雲脚浮動甌生光愚知公賜豈徒爾
欲俾下吏蠲俗腸滌除詩冗起清思驅逐睡興窮縑紉
玉川不暇盡七椀已覺兩腋清風翔

予家畜狸花二貓一日狸者獲鼠未食而花者竊
之以去家人不知以爲鼠自花獲也因感而作二

猫詩

狸猫得鼠活未食戲局之地武前後猫欺鼠困縱不逐
豈防厥類怠其守花猫狡計伺狸怠帖耳偷銜背之走
家人莫究狸所得只見花銜鼠在口予因竊覘見本末
卻笑家人反能否主人養猫不知用謬薄狸能服花厚
花雖利鼠乃欺主竊狸之功亦花醜人間顛倒常大此
利害于猫復何有

純甫以予去歲九日赴東陽今年復趨府作菊花
問答見遺因以戲答

問籬菊何事秋香欠春馥淵明歲歲走征塗冷落重陽
誰采劬

籬菊答自古人生有離合不得淵明泛玉觴還有子真
攜酒榼

附原唱

問籬菊誰遣金英秋始縟花枝依舊去年黃人髮不
如當日綠

籬菊答清香數日還飄颻縱使人生鬢易華猶見黃
花開幾匝

泉上人畫牡丹

芳樹不合生深堂座上似已聞生香乃知丹青逼造化
獨有真假爭毫芒枝外霏微包雨露筆跡淋漓濕縑素
遊蜂蛺蝶頻往來今日經營知汝誤蜀川趙昌妙花樹
前後無人昌獨步師今合昌成一人畫手紛紛那敢措
上人筆下如有神一掃欲空西洛春姚黃魏紫色憔悴
自覺筆假勝天真天工栽花苦榮謝畫工運巧無冬夏
天工巧極誰論價輸帛傾金只酬畫將令世俗尊造化
呼僮捲障不復掛

和樓志國范君武讀胡尉臨安所獲顏魯公書斷碑

書名唐世凡幾人魯公運筆獨有神當年一字百金直
異代儻獲宜爾珍公嘗道直不容內江湖出走刺史輪
東南揮翰落幾郡在處巨蹟刊堅珉石堅字巨未應泐
旋復五代遺荒屯州鎮尋兵寺觀火缺碑毀碣埋泥塵
乾坤豈亦愛字寶不使久屈卒不伸脗合陰假好事手
得此斷石溪山垠苔封土蝕初莫省一洗爛若開三辰
不由名氏驗體法氣質渾厚知顏筋點端屹如泰山立

畫勁森似長戟陳寧同棗木浪傳刻少陵尤惡肥失真
蒼茫疑聞地靈泣爲失此石后土貧好事得之不自有
能廣墨本遺其倫始從君武愜傳玩大句感發驚儒紳
寫公勲德無一欠何必讀史勞吾脣青衫志國繼高唱
首論書法辭逾新未言公忠死賊刃不覺憤淚霑予巾
昔人謂書乃心畫浮沈直撓皆相循公心遠可此書鑿
體不姿媚一以淳嚴嚴古氣自盤薄宜汝希烈不得臣
雖云筆力奪元化濟以忠誼重萬鈞後來忠誼弗公學
磨鉛臨帖虛終身李斯篆隸豈不好彰彰姦迹流自秦

乃知一藝不獨善所貴名節堅松筠魯公之善以名貴
歷代共寶無沉堙

送裴光世赴舉

光世出門頭懶回身將西去犯斗魁風雲自繫鵬鵠健
里道正爲驂驪開憶初鄉賦選主司數州側腦聽外臺
一朝吾鄉騰薦口姓名喜得了與裴筆搖試席動千指
匠精反媿木盡材六人旣拔里中傑黑白自可銷怨猜
君名稍稍近人底豈是天意激後來主司南宮頃第一
又嘗禮部預揀才

裴如晦嘗充省闈點檢官

頗傷辭律變新進怪僻

一鼓波遂頽旣而移書六人者歷數文弊有可哀且言
文章貴體要試格尤要合準裁六人旣拜主司教青雲
捷路知力推方今最曰場屋公實藝可進那用媒君曾
二紀富珍蘊每向紙上揮瓊瑰掛名省壁定顯赫續取
科第仍崔嵬明年躍馬游天街請君飲乾臨別盃

走筆送張伯起

男兒剛腸逾古鐵每到傷離猶暫折離緒不啻亂繭絲
纔攪衷腸便成結憶昨送子秋風前薄酒三行歌數闋
我歌多感酒易醺子車爲我澁不發今來與子舉別觴

還是去年分臂日人生歲歲有離恨爭道綠鬢不爲雪
安得共子並翼飛四方上下無時別

臨洛驛雨中作

朔野無花春意薄斧聲惟見桑枝落北人是日競條桑
手執懿筐共操作客亭繫馬吟寒廳細雨纏愁牢似縛
多情北燕能傍人如設春心繞疎箔故鄉桃李應滿園
爛漫香風隨處著十年游宦辭江湖塵土日侵雙鬢惡
天涯懷抱傾東南悶對青燈舉幽酌

丙午寒食厚卿置酒壓沙寺邀諸君觀梨花蘇子

由不至以詩來邀席客同作予走筆依韻和之

種梨易長地舊淤春風一掃無枯株沙頭古寺枕城角
樓殿自與人迹疎看花置酒三月破點檢座客唯欠蘇
酒酣花底不知處恍若身世游藥珠銅臺割據古豪盛
樂事已去唯邱墟直須及時結勝賞莫局官事同轅駒
林僧迎我屢前揖野鳥避客遙相呼咸陽有花遠莫見
豈若此地來須與風前嗅雪不宜緩春芳過眼猶奔車
繁枝向月合照映亂片落地無掃除樽邊醕酊不復計
馬上倒載聊拚扶子由閉戶自懶出花與雙眼知何辜

天姿必欲貴純白紅杏可婢桃可奴君詩險絕不容和
梁園騁思慙相如

寒食安厚卿具酒饌邀數君子遊歷沙寺觀梨花
獨蘇子由不至詩來命座客同賦予既次韻和之
明日上已安復置酒招予與蘇又明日清明予屈
二君爲射飲之會而蘇君仍用前韻作詩見及予
亦復和

花前爛醉如泥淤猶恐花過嗟空株壓沙梨開百頃雪
春晚未賞計已疎厚卿置酒趁寒食蜂喧蝶鬧人意蘇

林間把盞誰我侑鳥歌聲滑如溜珠魏都風流重行樂
艷妝麗服明郊墟我初聞招便勇往恨不插翼傳駿駒
峨眉夫子趣獨異靜坐幕府煩邀呼車公不到座寂寞
大句落紙來須臾樽邊弄筆輒強和布鼓乃敢當雷車
主人明朝復命客是日禊事修祓除日涵花氣暖不散
酒力易著起叟扶清明予亦飲射圃罰觴屢困辭不辜
杯盤一飽藉脫粟那有白飯餘君奴事見杜工部集梨花好在
期共醉功名身外終何如

送川僧玘上人歸雪竇

釋子羣羣蹈一轍類能恐誘鼓師說彼上人者劔外來
獨許清吟調風月就我乞詩歸甬東三叩賓階通刺謁
何時腰下解餅盂巖竇應逢先臘雪

小桃值風零落殆盡偶成鄙句奉呈諸君

小桃庭前祇一株無數花開豔新繡破樂脉脉向人笑
鬧枝酣酣索春鬪只見蜜蜂往來喧不道雙燕共時候
醉吟繞花日幾遭坐臥欲來花下就東風昨夜忽顛狂
曉枝點檢不依舊惜無錦障闊百步遮藏免被風力驟
小兒地上拾亂片猶愛殘香再三嗅桃兮開落奈汝何



原件短缺

却取餘杯醉春晝

近承楊子遣垂和池上短篇愛而有贈且攄予懷
楊子文格少已道自關以西鮮此流逸興一發不言休
詩吟千篇酒百甌始謂富貴力可求行年四十差厥謀
相逢渭水初清秋氣俊秋隼辭長蚪歡然一見分輒投
往來自爾月屢周忽聞屋角鳴春鳩感時出門寫我憂
載酒興慶荒池頭半酣繫馬聊登舟紛紛涉水驚眠鷗
晚陽欲落孤煙收開元盛事空林邱流年數百如回眸
陳迹隨感來吟搜偶作短句詒同遊楊子旣見遽和酬

窮山老松幹百尺縱有愛者勢難植小松聳擢未及丈
何亦冷落守巖石由來世眼習繁侈競事妖紅與爛白
往往破產聚名卉未見有一號松癖城中有客賣桃李
美價高下隨意得咄嗟彼叟何爲者浪負松木窮九陌
行求善價吻欲燥力弛還立朱門側過之千百絕一顧
寧復肯許一錢直音聲猶帶澗風澁顏色尚染嵐煙黑
松材雖良人未見其奈桃李有春色嗟哉子計信疎矣
豈宜肩入芳菲域速培舊土養松幹待棟明堂柱帝宅
予疑叟非鬻松者無乃矯世所爲特衆趨時好逞穠艷

何獨孑孑銜敝碧羣雄馳騁尙譎詐軻以仁義游六國
時乎釋老肆分籍愈以原道破羣惑叟乎叟乎爾知
獨行矯世難爲力

與盛毅同賦暮角行

城頭滾滾寒煙起城裏無人冷如水一聲暮角聒地來
聲中宛轉含餘哀逡巡流入單于調耳邊似近單于臺
坐客未終聽對面淚雙迸那復將軍絕寒眠朔風吹落
玉帳邊狼烟未盡不待曉恨不立起銘燕然何人始製
角中曲幽怨到今傳不足吁嗟畫角終無情百年日月

銷此聲

冬雪行

幼年壯氣寒逾熱更喜朱顏照飛雪門前地厚堆玉塵
展齒千回狂走折今來過壯能幾秋眼未見雪心先愁
病膚隱粟出門懶敝袍盡日紅爐頭此身知更十年後
雪屋能如今坐否層衾沒領定晝眠那復吟邊開凍口
壯齡袞袞洪濤奔百年浩蕩未易論人間萬事亦顛倒
且對今雪空清樽

送盛君方

示音集 卷三
秋風木葉飛邊徼日暮銅臺別杯醕燕姬一曲聲未終
交臂方携忽南掉相公鎮魏從辟書玉帳三年奉談笑
密謀直道裨主人飽食庸兒或陰誚君殊不顧但自若
炯炯誠心復誰照相公還朝數論薦援手無人在廊廟
薦章未報人事改魏國門前客相弔聖賢尚覬後世知
萬事那能目前料方今擢才不待次道路紛紛走嚴召
朝廷必欲收真才豈有如君使常調讀書適用非苟知
脫畧空言直趨要有餘利刃未一施可惜青萍反居鞘
誰能出力終提携會看驚人露芒耀君如弗偶好言命

予亦徐當卜耕釣

送知府吳龍圖

國初以來治蜀者處置盡自乖崖公當時奏使便宜敕
不與天下州府同行之已及八十載姦宄消伏誰之功
因循至此漸抗敝有未曉者時相攻鞭笞小罪亦檢察
不許略出常科中下民知之頗不懼州縣往往藏羣兇
側身斂足未動者實以累朝恩澤隆公之初來蜀人喜
慈愛久著民情通衆心歡然恥犯法挾藥浮薄歸醇醲
盡將約束付僚吏興起學校還文翁二年美化極沾洽

遠近循服如偃風上將歸公問誰代當使間作如笙鏞
遂求元老得青社其人廊廟之宗工往年鎮撫有異績
大旆再來遣于東公今與之合符去到必奉詔參夔龍
大資舊德固無慮剖判自出其心胸所憂厥後嗣之者
忠定良法遠如空養頑活狡作淵藪不免剪殄煩興戍
蒙之憤懣久填臆言賤不得通九重頌公上殿起居罷
第一用此聞宸聰

京師逢徐良溫叟明府

弱冠相逢今四十當年壯氣虬龍蟄交情獨在酒瓊深

人事細論衣袖濕詩書誤身浪自憐公相滿眼誰可揖
蒼顏已變長安風後會更應尤戢戢

小疾中元恕相別往長安信筆成篇奉送

一春三月少見晴濕雲不飛壓花老君來別我西出關
病裏傷離似翁媪和風吹面纔幾程卽入風流洛陽道
司農水利無留行洛城花開爲誰好漢唐陳跡到可尋
猶有山川豁懷抱憶昨行春從魏公興慶池邊玉樽倒
公今已爲泉下游往事憑君問煙草官家諸路急使才
歸對明光切須早

題可久上人房素屏

雕軒畫室吳僧居花草禽魚屏面集豈如蕭爽大士堂
雪山數尺平頭立滿齋虛白已自生隅坐紛華不容入
霜毫一掃都無痕獨有淋漓粉光濕丹青世上空紘紘
趣與師同百無十常時吟客唯我來共愛此屏微靜翕
目睛難駐手試捫指下瑠璃無寸澀願乘醉筆留幾行
爲寫高僧白雲什

送王賓玉

相加昔乘使者車縣令負弩當前驅頗矜意氣誇里閭

檄詞爛漫肆欺誣歸來不說民飢臞餘佞便留封禪書
江山清絕冠天區豈甘久被斯人汙邇來炳靈軼古初
耆俊相繼馳亨衢堂堂御史今名儒志節慷慨忠義俱
才高識遠器有餘不似文園淺丈夫一朝持節歸成都
使星皎皎臨坤隅輟從憲府恩意殊霜威鷲擊正所須
姦胥所在密于茶交券計斤良可吁鋤凶芟穢忌踟蹰
元惡須行七日誅惡除惠澤益霑濡頓使枯瘠俱豐腴
坐茵未暖氍毹綸詔歸還直承明廬朝廷急賢恢遠圖
碧雞金馬不用渠以人報國功難踰諸生中有何武無

謝三門提舉輦運宋叔達郎中寄古碑雜言

長安古名都漢唐以來帝王宅當時高冠大帶接跡公
卿間聲名大半文章伯能書萬變軼出意象外那踴體
法就常格傑辭精翰在處勒琬琰從此關西富碑石咸
陽原頭螭蟠龜負莫知數風雨皴剝塵土蝕荒郊壞宇
大者卧榛莽小者老祠佛廟往往龕屋壁憶初來長安
于此心頗溺朝披夕購自忘勸一紙不吝白金易豈惟
讀辭玩點畫漢唐往事皆歷歷始者累一以至百今既
累百至千未免廣搜覓古人載書兼兩懼猜謗今我車

載不足更囊積中郎知我有碑癖封寄數本跨數驛中
郎中郎雖欲遂愚僻愚也字學不進格文不長翻愧嗜
此苦無益雖然古人亦或有所嗜又恐一朝捨此愚意
無以適碑乎誓將蓄汝永吾好不已聖猶賢博奕

謝陳伯成學士

蓬萊仙人才偉英三世實以文章稱持盃玉虹吸澗壑
奮筆金虎虓邱陵開懷未嘗有表暴出語矧復無驕矜
超然古人考是否蔑爾時俗論愛憎識君始者兩俱少
獨我今也百不能半載沈疴類瘦鶴終朝癡臥如凍蠅

醫工診臂卽司命藥債攪心逾惡朋煩君數月一問訊
使我多感常填膺感而有贈不須怪近來交態猶春冰

謝堉

臣謝堉 堉恭校

祠部集卷四

宋

強

至

撰

五言律詩

李花

地暖春纔半蹊深氣已暄風光何處好雪浪此時翻勻
似金刀翦裝成玉杖繁天桃漫相壓吏部竟誰言

曉鐘

縹緲驚春夢鏗轟送曉聲敲烟出野寺催月下山城窻
映東方白燈留半壁明隱然餘韻在羣動已營營

閏月晦日

乾坤一傳舍日月兩征輪邂逅逢餘閏連綿送晚春巢
邊迎燕熟枝上數花頻漸暖茅簷日吾將理葛巾

落花

林間花自飛物理不應悲偶對飄殘地休論艷發時有
情香水面無數點河湄蜂蝶含餘意徘徊繞舊枝

正因訪楊公濟遂同步野夫家省其母野夫時就試

南宮

馬繫揚雄宅門過孟母鄰升堂子獨拜其母同并子兼

親

公濟所居與之密邇

萬卷先生富千金舊產貧早將安穩字去

慰杏園春

同楊公濟賦破山得開字

無物終天地青山豈免開萬人鑿秀骨一氣失全胚漫
貯崇朝雨猶防浩劫灰何年巨靈手曾此擘崔嵬

同楊公濟賦晚過西村

空影倒波面晚陽留樹梢人煙青近郭鳥道暗長郊世
外空搔首溪邊懶結茅滄浪那敢羨漁父定吾嘲

苦雨

雨脚灑不斷魚龍沸巨溟浮泥溢平地暴雨入中庭門
巷絕尋訪壺觴誰醉醒頑雲速收斂渴欲覩天晴

螢

幸藉炎蒸力因遷腐草蹤清宵能自照暗室肯相容雨
巷幽光晦風簾亂點重臨書方汝賴唯恐有鳴蜚

種藥

百藥吾誰辨農皇舊有經傾金購善種按譜驗真形易
地防根瘦他時欲劑靈天時縱不雨灌溉賴園丁

贈於潛張定國

蕭散潛川令才高氣亦剛學攻諸子短能涉衆人長日
月銷書卷功名撫劍鏃他年有大用莫漫比柴桑

某近與和叔游景愛之不足因吟短篇以贈

夫子南州傑相逢出肺肝平生潛聖闢壯歲尚儒冠鴟
鷂霄垠擊蛟龍井底蟠恥將孤憤劔容易向人彈

贈李熊先輩二首

齒岑閩人秀夫君得最完文章醇不雜氣質渾無刳場
屋聞新詔鄉閭正素冠天應老賢業頭角壯年蟠

詔書一日至多士競軒眉獨有儒林傑方纏風樹悲飢

腸惟飽學正口絕柔辭從古器大者於中成就遲

與王仲密諸君泛湖

十月清霜後孤舟顛氣間酒邊頹白日棹底倒青山境
勝歡憂泯吟頻物象慳吾儕一笑後魚鳥伴誰閒

急棹趨吳門

寒日山尖落孤烟樹杪屯水流天欲動舟急岸如奔縹
緲穿雲角蒼茫望郭門片心爭宿鳥去去近黃昏

初入汴

山勢隨淮斷河流帶地渾巖風疎樹影落日露沙痕客

興雙蓬鬢吟懷一酒尊舟行那敢緩霜意滿乾坤

新鶯

未見攀花宿纔聞隔葉歌可憐毛羽細莫怪語言多匹
馬春風路輕舟夜月波數聲來入耳最奈客愁何

穀下春日

楊柳長安陌游車綿繡香漫傾春日酒誤入少年場意
氣青雲客風流白面郎致身愁獨晚點檢鬢毛蒼

寒日前二日對雨

紅濕花枝軟青涵柳色鮮未開新禁火自起欲晴煙坐

卧銷佳節招尋憶舊年故鄉游樂地心折泛湖船

對雨寄楊公濟

江海歲云晏雨冥風自凄葉光羣木洗翅濕幾禽低靜
榻敲寒枕孤城隱暮輦少陵車馬客催踏草堂泥

雨中呈丁評事

騷雅丁夫子年來客路岐故關春夢後獨館雨留時詩
有龜兒掌游須驥子隨

令嗣侍行

君家千歲鶴應解念歸遲

歸鳥

日落羣山靜天寒獨鳥歸聲悲故巢遠影入片雲微蹤

跡憐吾滯青冥羨汝飛莫為雙翼誤須避暗中機

宿慧安院

積淖厭行路解鞍欣曲肱疾風穿敝屋細雨濕青燈聒
夜有饑鼠觀空無定僧中宵塵累息山水思填膺

九日病中泊舟召伯堰

采采南山菊還應滿故園

予之小圃實占南山

全家泊孤埭多病

負清樽木末秋聲老天涯雨氣昏鄉關吟望外愁淚有
雙痕

某為府曹伏蒙吳先生以詩見寄謹依韻奉酬

瘦馬風埃裏蕭疎分亦安閒趨京兆尹冷甚廣文官錦
繡頰詩句松筠映歲寒天邊師坐闊南望只長歎

同盛任道賦暮陰得寒字

野館臨空闊江城起暮寒年光去天末雪意上雲端自
失歸禽影能侵病客肝莫將愁對景入夜轉漫漫

次韻禮之齋中述懷

僻坐治孤學取書窺古人高風凜如在千載邈相親欲
滿詩書腹寧規富貴身獨君知己厚無亦慮吾貧

春雨一篇呈純甫賢僚縣庠諸彥

漠漠陰常結垂垂勢未收潤多宜土脉落久驗溪流與
物知無間於花似有雛少年車馬客惆悵爲君游

三月大寒偶書短句

上天誰與問四序曷相干已季春成暮當溫氣反寒農
心憂地凍俗眼惜花殘我豈殊民意身爲父母官

經春罕嘗見花今出湖上悉已離披

飛花何太急春在豈須忙亂點不經眼殘枝猶斷腸愁
看湖色淨怯照鬢毛霜回首壯游地幽襟付淺觴

山中遇雨

馬上涼秋雨隨愁入亂山垂垂衣袖重點點鬢毛斑
鳥寒聲外漁樵古畫間片時全嶺暗急趁暮鐘還

純甫小池生雙蓮

造化有詭異雙葉共萼翻凌波洛神艷泣竹舜妃魂
所得雖欣地猶孤尚笑根聖朝不言瑞圖獻恨無門

和純甫獨往至德上方避暑

做屋數楹隘炎曦一線長梅仙厭煩溽蕭寺得清涼
山鳥聒幽耳澗泉蠲渴腸茲遊君獨勝河朔浪飛觴
通判國博惠建茶且有對啜之戲因以奉謝

數餅建溪春求逾尺璧珍封從鄉國遠惠與郡僚均
午榻忘摺臂晨觴厭啓唇拜嘉當對啜相待况如賓

書窻

一室微吟地開窻更欲虛入雲驚紙破照月愛樗疎
野色連朝夕秋光滿屋廬何如謝太守遠岫獨相於

寄題張殿直長春亭

甲第俯河湄修亭面勢宜琴樽長有樂草木似無衰
境勝青山敵心開白日遲祖良迷大隱獨與赤松期

寄題郭明府寺丞頴上西齋

退築謀何早閒居興頗濃渠流通潁派窻列隔淮峯玉
塵談賓盛牙籤載籍重雨巾時墊角一代慕林宗

奉答雅均途中見寄二首

濁流非猛激無以頓澄明此邑先膏潤今予力潔清人
皆疑矯行君獨照真誠一得途中什謔衆口平

貧固誠吾分廉斯亦士常漫多愚執守媿少子文章均雅

前篇頗憐予廉貧復有論文有力之句雖幸相逢近猶嗟此別長何時却

南轡重把論詩觴

觀碁

鬪智不鬪力一枰思解圍防人甚勅敵平地有危機蝸
角爭先後狼心競是非傍觀縮手者往往見精微

九日過後漫題堂前雙菊

花日金相照條風翠競翻誰言羞晚艷自喜勝孤根客
土深培力家人一概恩秋香真好在未易負清樽

和純甫紅葉

秋園無艷色特地起西風閒向煙林翠時呈霜片紅霞
光青漢襯燈炬碧紗籠不解隨松柏染裁煩化工

再次韻和純甫紅葉之什

徒密嗤翠幄有文殊紫屏因霜變顏色點樹作丹青廢
苑掃還聚疎林生易形秋風無別艷祝爾莫飄零

挺山道中早行有感二首

晨興事行役寸祿此時輕撲面風霜緊隔林雞犬鳴遙
天分淡色殘月露微明便欲投簪去無田可力耕
山驛孤燈盡霜天片月低還家人自喜戀樞馬頻嘶野
水分微白巢禽驚穩棲前村應曙色依約數聲雞

宿山寺

蒼莽窮山路蕭森古寺門夢清宵殿月淚迸曉枝猿人

事隨羣動山情阻細論城中塵沒眼愁思滿歸軒

某承乏東陽周親惠然顧訪未幾告別以詩餞之
親戚富貴合賤貧宜見疎獨君從遠道爲我枉高車相
得未逾月薄言還故廬風霜正妻暮臨別尚躊躇

晚登至德上方偶書短篇呈山主雲公

城市隔半舍

院距邑十五里

好山寧在深亂雲歸別塢落日照

疎林能解外緣縛始堅安任心冠裳方我誘漫作愛山
吟

離東坡後寄題義師上方

山水東陽富僧居更翠微晴峰露秋骨古樹滅煙圍啼
鳥遠相應孤蜂閒自歸予生秉幽尚夢想在禪扉

劉叔茂及弟後往廣德拜親過吳江新治

今歲同升客如君有幾人青年登一第白首具雙親喜
氣生軍壘懽迎聚邑民諸兄在天祿勉去繼清塵

惠山泉

封寄晉陵船東南第一泉出瓶雲液碎落鼎月波圓正
味云誰別繁聲只自憐要須茶品對合煮建溪先

官滿將見舍弟

三歲別吾弟今歸心始降從茲得安寢無夢過重江預
驗鵲音喜行看鴈影雙西湖猶可泛酩酒市羊羜

途中寄純甫

諸友分攜地重陽欲近天共誰搴菊蕊獨立憶梅仙對
飲乖今日傷離似去年佳山足吟賞應自有新篇

志遠法師挽辭

寂寞湖邊寺荆溪目已瞑窻雲猶曉白竹徑自寒青野
鳥悲吟動門人感涕零里無梁補闕誰可法師銘

庚子歲除輦下作

呼兒來秉燭點檢鬢邊絲志在驚時晚年加願曉遲京
華猶旅食世態益吾悲四十明朝是愁吟杜子詩

久雨見月

千門却燈燭久雨愛冰輪愁眼開今夕清光對故人更
長頻側帽望極反霑巾幾爲浮雲掩行藏類此身

立春

宿凍歸何處池塘漲暖波日盤花面永風入鳥聲和俎
菜堆生菜闥裳剪薄羅獨憐詩酒興早較昨宵多

依韻和粹中早春

寒威猶壓曉淑氣已回春不道朱顏舊剛憐華歲新震
雷將出地蟄戶莫存身漸報鶯花信眉頭日漸伸

早春寄擇之

北陸寒威盡東郊晝景添風和引禽哢冰暖出魚潛草
木回生意乾坤待澤漸寧知巖谷下經歲嘆才淹

正月三日郊外馬上作

長日牽人事新年散馬蹄和風吹凍柳殘雪點春泥意
愜境自勝興來杯屢攜徘徊羨飛鳥曉逐野雲低

禁烟節同子玉徐先生野步

繫馬道邊樹杖藜坡外岡風來花自笑露過草猶香樂
事論三月吟懷驚八荒時平那有感雙淚肯浪浪

其日春色

淺深花面染來去柳邊浮雨氣那能洗年光亦共流濃
濃交綠野拂拂上朱樓轉恐紛華眼蕭條不愛秋

北山題劉有方御藥翠巖亭

購石黃金費開軒翠玉叢端居憐象魏遠意自衡嵩花
弄疎簾日禽呼靜榻風移山寧有術未易笑愚公

升之元真觀讀書

白日無停運青雲要早圖寓居隣上士述作擬潛夫案
冗書籤滿窻明樹影孤徘徊拂塵壁一半舊題無

送李厚秘校赴相州戶曹

迎婦金貂宅之官銅雀臺俱新是婚宦有素獨詞才簿
領時能撥圖書日可開無勞歎州縣自足脫塵埃

只因醉臥

彭澤終朝飲杯乾入醉鄉眩頭遺野憤坦腹委藜牀吏
部甕邊臥山公馬上狂何如此安穩寢興爲吾長

和叔以琴詩見貽因成一篇奉答

製就七絃器斲殘千古桐正聲希世出羣耳此時聾
暗列星隱意存流水空憑君莫輕撫留取和薰風

古劍

只因耕戰地得此古龍泉磨拭自今日埋藏曾幾年無
將試蛟窟宜待靜狼烟寄語姦邪輩當鋒莫向前

壓書玉兔

白玉雙蹲兔工深刻楮勞長疑奔月窟渾欲動霜毛似
喜書成穴猶驚筆有毫案間誰汝待自覺守株高

陽睢春日偶書二首

東柳輕能舞枯河暖亦流東風應自好遠客獨含愁攬
鏡傷吟鬢無錢買釣舟誰能終日興大半在滄洲
楊柳亡隋岸風塵舊宋州寄家盈百指憶弟濕雙眸旅
宦那能定人生本自浮旋酤街北酒準擬送春愁

睢陽別包進甫

飲徧長安酒春風送馬蹄異鄉憐會合明日復東西行
興看君速歸期恨我稽門前客星瀨到日濯塵泥

別希魯回馬上口占

兄佐諸侯幕愚居孝子廬奔馳他自得情味獨相於先

送秋帆動還嗟友席虛平生感知淚今日為漣如

大風

正月明朝盡東風半夜狂乾坤搖蓋軸草樹拔毫芒亂瓦飄無數寒沙走更忙聖時讒口絕天令莫乖常

寄盛子美俞元功二先輩

二公得第後守選寓相國寺習試法

彼美吳州傑相從蕭寺居聊窮三尺律肯恃五車書前

有殊尤等行當選擢初秋風吹客袂鄉思復何如

試法新立

等數

寄公立

一朝揮別袂九日在征岐識我相思意如君獨坐時榴花須滿瓊菊蕊况盈枝目下重陽淚宜看杜牧詩

寄俞君度

夫子憊已甚平生心向存黃金空舊產白首寄他門獨

酌醉應淺愁吟聲更吞飄零那復久知已有平原

員外陸先

其貧

過洛州

朔野風煙古臨洛氣象存魏風沿土性漳水抱城根故壘盤荒草殘碑落近村太平民產富桑柘半郊原

一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

臣謝墉恭校

